



## **Kalaallit Nunaanni inatsisitigut siunnersortittarneq nalinginnaasoq aamma annertusisaq pillugu ilitsersuut**

Eqqartuussissuserisut suliassinneqarsinnaasut Kalaallit Nunaanni allaffillit inunnut, aningaasatigut piumasagaatinik § 254, imm. 3-mi aalajangersarneqartunik naammassinnittunut, inatsisitigut siunnersuisussaapput, eqqartuussisarnermik inatsimmi § 84, imm. 1 naapertorlugu.

Tamatuma saniatigut Kalaallit Nunaanni eqqartuussissuserisuni inatsisitigut siunnersortittarneq pillugu nalunaarummi § 1, imm. 1-imit ersersinneqarpoq eqqartuussissuserisut suliassinneqarsinnaanngitsut, inatsiseqarnermut ministerip oqartussaataitanut nalunaaruteqarlutik taamatut suliaqarsinnaasut. Eqqartuussissuserisut taamaalillutik taamatut pisussaaffeqalerumallutik Kalaallit Nunaanni Eqqartuussivimmut noqqaassuteqarsinnaapput.

Nalunaarummi § 1, imm. 2 naapertorlugu Kalaallit Nunaanni Eqqartuussivik eqqartuussissuserisut inatsisitigut ikiorsiisinnaasut allattugaatigisussaavai. Aammattaaq Kalaallit Nunaanni Eqqartuussiviup nakkutigisussaavaa inatsisitigut siunnersorneqarnissamut aningaasatigut piumasagaatit naammassineqarsimanersut.

Nalunaarut malillugu aamma Kalaallit Nunaanni Eqqartuussiviup inatsisitigut siunnersuinissaq nalinginnaasoq aamma annertusisaq pillugu noqqaassutit sularisartussaavai.

### **Noqqaassutininik Kalaallit Nunaanni Eqqartuussivimmi suliaqarneq**

Kalaallit Nunaanni Eqqartuussiviup eqqartuussissuserisoq akissarsisissavaa, immersugassaq civilstyrelsimit sananeqarsimasoq tunngavigalugu. Immersugassaq uani aaneqarsinnaavoq [www.civilstyrelsen.dk](http://www.civilstyrelsen.dk)

Kalaallit Nunaanni Eqqartuussiviup pisariaqarsoriguniuk – pingaartumik inatsisitigut anner-tusisamik siunnersuisoqarsimatillugu – eqqartuussissuserisoq suliaq pillugu akissarsiassat tunniunneqartinnagit ersarinnerusumik nalunaarusioqqusinnaavaa.

Noqqaassutit Kalaallit Nunaanni Eqqartuussivimmi imatut suliarineqassapput:

## **1. Inatsisitigut siunnersuineq nalinginnaasoq**

Inatsisitigut siunnersuinnermut nalinginnaasumut ilaapput oqaatsitigut siunnersuineq aamma saaffiginnissutinik nalinginnaasunik ataasiakkaanik allanneq, matumunnga ilanngullugit akeqanngitsumik eqqartuussisulersuussinissamik qinnuteqaat, eqqartuussivimmi suliaassani allakkiat, pigisanik agguaassineq pillugu isumaqatigiissusiornerit, kingornussassialiat aap-pariillu aalajangersagaat ajornaatsut.

Makkununnga inatsisitigut siunnersuisoqarsinnaanngilaq:

- 1) pisortatigoortumik suliaassani pineqaatissiissutaasinnaasuni pasisanut imaluunniit unner-luutigineqartunut,
- 2) inuussutissarsiummik ingerlatallit suliaassiissutaanni, inuussutissarsiornermut tunngassu-teqarnerusuni,
- 3) akiitsunik iluarsartuineq pillugu suliaassani aamma
- 4) suliaassani, pisorta qarfiup ingerlatsivianut tunngasuni imaluunniit tassani suliarineqartuni, isumaqartoqarsinnaappat ingerlatsivik pisariaqartumik ilitsersuisoq aamma ikiorsiisoq.

Taamaattoq pisorta qarfiup ingerlatsiviata aalajangiineranik maalaarutiginninnissamut, nr. 4 apeqqutaatinnagu, inatsisitigut siunnersuisoqarsinnaavoq.

Nalunaarummi § 6, imm. 1 naapertorlugu eqqartuussissuserisoq inatsisitigut siunnersuisin-naavoq qulaani taaneqartutut annertussusilimmik, 950 kr.<sup>1</sup> angullugit akilersilluni.

Eqqartuussissuserisoq nalinginnaasumik inatsisitigut siunnersuissaguni Kalaallit Nunaanni Eqqartuussivimmiit akuersissummik piniaqqaartariaqanngilaq.

Siunnersuisoqareerpat eqqartuussissuserisup allagartat uppernarsaatit makku Kalaallit Nu-naanni Eqqartuussivimmut nassitussavai:

---

<sup>1</sup> Aningaasatigut killissaritit ukiumoortumik naleqqussarneqartarput, naleq. Kalaallit Nunaanni eqqartuussissuserisuni inatsisitigut siunnersuisarneq pillugu nalunaarut kingulleq, nr. 1430, 14. december 2010-meersoq.

- Immersugassaq, Kalaallit Nunaanni eqqartuussissuserisuni inatsisitigut siunnersorneqartarnej pillugu nalunaarut naapertorlugu Kalaallit Nunaanni inatsisitigut siunnersortinnermi atugassaq.
- Inatsisitigut siunnersortinnissamik qinnuteqartup isertitaanut uppernarsaat.

Uppernarsaatit scannerlugit e-mailikkut nassiunneqarsinnaapput uunga [post.rig@domstol.gl](mailto:post.rig@domstol.gl)

Kalaallit Nunaanni Eqqartuussivimmi Eqqartuussisup, imaluunniit taamaaliornissamut piginnaanilerneqarsimasup, qulakkeereerpagu inatsisitigut siunnersorneqarnissamut aningaasatigut piunasaqaatit naammassineqarsimasut, noqqaassut akuerineqassaaq, eqqartuussiveqarfiullu allaffissornermut immikkoortortaarfianut nassiunneqassaaq, tassanngaanniillu aningaasat pineqartut eqqartuussissuserisup aningaaserivimmi kontoanut nuunneqassapput.

Suliassaq immikkut normulerneqassanngilaq, kisianni allaffissornikkut immikkoortortaarfiup nalunaarsuiffiliaani journalnormup 8800-ip ataani nalunaarsorneqassaaq.

Immikkut nukingussassaqartoqartillugu, uppernarsaatinik takutitsisoqanngikkaluartoq, nalinginnaasumik inatsisitigut siunnersuisoqarsinnaavoq, isumaqartoqartariaqarpat aningaasatigut piunasaqaatit naammassineqarsimasut.

## 2. Inatsisitigut siunnersueqqinneq/annertusisaaq

Inatsisitigut siunnersortinnissamik qinnuteqartoq suliassami tamatumanerpiaq nalunaarummi § 5, imm. 1 naapertorlugu inatsisitigut siunnersortissinnaavoq nalinginaasumik, aamma § 5, imm. 2 naapertorlugu inatsisitigut siunnersortissinnaavoq annertusisamik, taamaaliornissamut piunasaqaatit naammassineqarsimappata.

Inatsisitigut siunnersuisoqassaaq annertusisamik, taamaaliornissaaq pissutsinit immikkut itunit ilalernartinneqarpat – aamma neriunaateqarpat suliamik isumaqatigiilersitsinikkut qanittukkut aaqqiissuteqartoqassasoq.

Taamaalilluni inatsisitigut siunnersortinneq annertusisaaq eqqartuussissuserisup immikkut suliaqarnerusinnaaneranik, inatsisitigut siunnersortinnermut nalinginnaasumut ilaasunik, nassataqanngilaq.”Annertusisaaq” paasineqassaaq tassaasoq immikkut suliaqarneq, suliap isumaqatigiissutigineqarneratigut aaqqiissuteqarnissaaq anguniarlugu – eqqartuussivik aku-liunnagu.

Nalunaarummi § 6, imm. 2 naapertorlugu eqqartuussissuserisoq Kalaallit Nunaanni Eqqartuussivimmiit **siumoortumik** akueritilluni inatsisitigut siunnersuisinnaavoq qulaani taaneqartutut annertussusilimmik, 2,170 kr. angullugit akilersilluni.

Eqqartuussissuserisoq suliap suliarineqarnerata nalaani naliliippat inatsisitigut annertusisamik siunnersuinissamut periarfissaqartoq, allagartat uppernarsaatit makku Kalaallit Nunaanni Eqqartuussivimmut nassiunneqassapput,

- Immersugassaq, Kalaallit Nunaanni eqqartuussissuserisuni inatsisitigut siunnersorneqartarneq pillugu nalunaarut naapertorlugu Kalaallit Nunaanni inatsisitigut siunnersortinnermi atugassaq.
- Pissutsit immikkut ittut, annertusisamik inatsisitigut siunnersuinissamut ilaliisut, pillugit naatsumik nassuiaat.

Tassa imaappoq eqqartuussissuserisoq inatsisitigut siunnersuisinnaatitaasoq inatsisitigut siunnersuinissaq nalinginnaasoq pillugu qinnuteqaammik Kalaallit Nunaanni Eqqartuussivimmut nassiusseqqaassaaq, tamatumunngalu atatillugu inatsisitigut siunnersuinissamik annertusisamik akuerineqarnissaminik qinnuteqassasoq. Akuersissuteqartoqarpat, inatsisitigullu siunnersuineq annertusisaaq naammassippat, immersugassaq Kalaallit Nunaanni Eqqartuussivimmut nassiunneqassaaq, inatsisitigut siunnersuinissamik annertusisamik akuersissut ilanngullugu.

Akuersissummik piniartoqareersimanngippat inatsisitigut siunnersuinissamik annertusisamik kingusinnerusukkut qinnuteqartoqarsinnaanngilaq, noqqaassullu taamaattoq itigartitsisutiginneqassaaq.

Kalaallit Nunaanni Eqqartuussivimmi Eqqartuussisup, imaluunniit taamaaliornissamut piginnaanilerneqarsimasup, noqqaassut akuerissavaa, eqqartuussiveqarfiullu allaffissornermut immikkoortortaarfianut nassiullugu, tassanngaanniillu aningaasat pineqartut eqqartuussisuserisup aningaaserivimmi kontoanut nuunneqassapput.

### **3. Nalunaarummi § 6, imm. 3 naapertorlugu akissarsiat qaffatat**

Inatsisitigut siunnersuinnermut atatillugu piffissamik atuinerusoqarsimappat, assersuutigalugu oqalutseqartariaqarneq pissutigalugu imaluunniit siunnersortittup eqqartuussissuserisoq illoqarfeqatiginngimmagu, akigititap marloriaataa tikillugu akissarsisoqarsinnaavoq, naleq. § 6, imm. 3.<sup>2</sup>

---

<sup>2</sup> Nalunaarummi missingersuusaaqqaartumi akissarsianik qaffaanissamut periarfissaqarsimanngilaq. § 6, imm. 3 nalunaarummut ilanngunneqarsimavoq, ilaatigut Kalaallit Nunaanni eqqartuussiviit tusarniaavigineqarlutik akissuteqaatiminni uparuaammata pissutsit eqqaaneqartut pissutigalugit akissarsiat pissutsini immikkut ittuni qaffanneqarsinnaanissaat pisariaqartoq.

Nalinginnaasumik inatsisitigut siunnersorneqarnissamiit annertunerusumik siunnersuinissap pisariaqarsimanera akissarsiat marloriaatinngortinneqarnerannut tunngavilersuutigineqarsinnaangilaq.

Eqqartuussissuserisoq isumaqarpat suliami inatsisitigut siunnersuisoqaqqissinnaasoq, siunnersorneqarnermiit nalinginnaasumiit annertunerusumik, inatsisitigut siunnersuisarneq annertusisaq pillugu malittarisassat malinneqassapput.

Eqqartuussissuserisoq siunnersuisinnaatitaasoq nalunaarummi § 6, imm. 3 naapertorlugu qaffatanik akissarsiaqarusukkuni, tamanna pillugu noqqaassummik tunngavilersukkamik nassiussaqaassaaq, noqqaassummut nassiussinerminut atatillugu. Taava Kalaallit Nunaanni Eqqartuussiviup noqqaassut isummerfigissavaa.

#### **4. Maleruagassat**

Paasissutissat amerlanerusut pillugit innersuussutigineqassaaq Kalaallit Nunaanni eqqartuussissuserisuni inatsisitigut siunnersorneqartarneq pillugu nalunaarut kingulleq nr. 1430, 14. december 2010-meersoq. Nalunaarusiortoqarpoq eqqartuussisarnermik inatsimmi § 84, imm. 3 aamma 4 naapertorlugu.

Thomas Trier Hansen